

## Сийрат дарслари (35-дарс)

СИЙРАТ  
дарслари 35-дарс

ISLOM.UZ

Сийрат дарслари Шайх Мұхаммад Содиқ Мұхаммад Юсуф роҳимаҳуллоҳнинг «Бу – Расулуллоҳ соллаллоҳу алайҳи васаллам» таржима китоблари ва «Ҳадис ва ҳаёт» нинг 19-жузъи асосида бериб борилади. Мавзуларнинг тўлиқ матни билан танишиш учун китобнинг ўзига мурожаат этиш тавсия этилади.

13:40 / 31.05.2019 3908

### Нубувват аломатлари китоби

188. Абу Ҳурайра розияллоҳу анҳудан ривоят қилинади:

«Расулуллоҳ соллаллоҳу алайҳи васаллам: «Мен Қиёмат куни одам боласининг улуғидирман. Устидан қабр биринчи ёриладиган киши менман. Аввалги шафоатчи менман. Аввалги шафоат қилинувчи менман», дедилар.

Муслим ривоят қилган.

\* \* \*

189. Жобир ибн Абдуллоҳ розияллоҳу анҳумодан ривоят қилинади:

«Расулуллоҳ соллаллоҳу алайҳи васаллам: «Менга олдин ҳеч кимга берилмаган беш нарса берилди: ҳар бир набий ўз қавмига хос қилиб юборилар эди, мен барча қизил ва қора (рангли)ларга юборилдим. Менга ўлжалар ҳалол қилинди, мендан олдин ҳеч кимга ҳалол қилинмаган эди. Менга ер масжид ва покловчи нарса қилинди, бас, менинг умматимдан кимга қаерда намоз ўқиши (вакти) етса, ўша ерда ўқисин. Менга бир ойлик масофадан кучли қўрқинч билан нусрат берилди. Менга шафоат берилди», дедилар».

*Бухорий ва Муслим ривоят қилишган.*

\* \* \*

*190. Абу Ҳурайра розияллоҳу анҳудан ривоят қилинади:*

**«Расулуллоҳ соллаллоҳу алайҳи васаллам: «Жамловчи калималар билан юборилдим. Менга қўрқинч ила нусрат берилди. Ухлаб ётганимда менга ер хазиналарининг калитлари келтирилди ва қўлимга тутқазилди», дедилар.**

Абу Ҳурайра айтди: «Расулуллоҳ соллаллоҳу алайҳи васаллам кетдилар. Сизлар эса уларни чиқариб олмоқдасизлар».

*Бухорий ва Муслим ривоят қилишган.*

Бошқа ривоятда: «Расулуллоҳ соллаллоҳу алайҳи васаллам айтдилар: «**Бошқа анбиёлардан олти нарса билан афзал қилиндим: Менга жамловчи калом берилди. Менга душманимга қўрқинч солиш билан нусрат берилди. Менга ўлжалар ҳалол қилинди. Менга ер покловчи ва масжид қилинди. Мен ҳамма ҳалойикқа юборилдим. Мен билан набийлар тугатилди».**

*Муслим ривоят қилган.*

\* \* \*

*191. Ҳузайфа ибн Ямон розияллоҳу анҳумодан ривоят қилинади:*

**«Расулуллоҳ соллаллоҳу алайҳи васаллам айтдилар: «Уч нарса билан одамлардан афзал қилиндик: сафларимиз худди фаришталарнинг сафлариdek қилинди; Ернинг ҳаммаси биз учун масжид қилинди; сув топмасак, унинг тупроғи биз учун покловчи қилинди».**

*Муслим ривоят қилган.*

\* \* \*

*192. Абу Ҳурайра розияллоҳу анҳудан ривоят қилинади:*

Расулуллоҳ соллаллоҳу алайҳи васаллам айтдилар: «**Қай бир набий борки, албатта, унга оятлардан иймон келтирилганича ёки одамлар иймон келтирганича берилган. Менга берилган нарса эса, Аллоҳ менга қилган ваҳий бўлди. Бас, Қиёмат куни уларнинг эргашувчиси энг кўпи бўлишимни умид қиласман».**

*Бухорий ва Муслим ривоят қилишган.*

**«Бу - Расулуллоҳ соллаллоҳу алайҳи васаллам» китобидан**